



**KEMENTERIAN KESIHATAN MALAYSIA  
MINISTRY OF HEALTH MALAYSIA**

Kementerian Kesihatan Malaysia,  
Aras 12, Blok E7, Parcel E,  
Pusat Pentadbiran Kerajaan  
Persekutuan,  
62590 Putrajaya

**KENYATAAN AKHBAR  
MENTERI KESIHATAN MALAYSIA**

**MENGENAI KES KEMATIAN *MIDDLE EAST RESPIRATORY SYNDROME  
CORONAVIRUS (MERS-CoV)* WARGA TEMPATAN**

Kementerian Kesihatan Malaysia (KKM) ingin memaklumkan mengenai satu (1) kes kematian yang disahkan dijangkiti MERS-CoV melibatkan seorang lelaki Melayu warga Malaysia berusia 54 tahun, berasal dari Batu Pahat, Johor. Hasil siasatan mendapati beliau baru pulang ke Malaysia dari mengerjakan umrah dan tiba di Malaysia pada 29 Mac 2014. Pada 8-9 April 2014, beliau mengalami gejala demam, batuk dan kesukaran untuk bernafas. Pada 10 April 2014, beliau telah dimasukkan ke Hospital Sultanah Nora Ismail (HSNI), untuk pemeriksaan dan rawatan lanjut. Keadaan beliau menjadi semakin tenat dan disahkan meninggal dunia pada 13 April 2014, jam 9:57 pagi. Hasil siasatan mendapati punca kematian adalah *Severe Pneumonia Secondary to MERS-CoV*.

KKM sedang menjalankan aktiviti pencegahan serta kawalan, termasuk membuat pemantauan ke atas kontak rapat (*close contact*) dengan kes. Amalan pencegahan dan kawalan infeksi di kalangan anggota kesihatan diperkukuhkan, dan pemantauan terhadap anggota kesihatan yang terlibat dalam mengendalikan kes berkaitan. Untuk tujuan ini juga, orang awam yang menaiki penerbangan *Turkish Airlines* (TK93 dan TK60) bagi perjalanan dari Jeddah-Istanbul-Kuala Lumpur pada 29 Mac 2014 adalah diminta menghubungi nombor berikut bagi membantu pihak KKM menjalankan pemantauan; i) 03-8881 0600 / 0700 (Isnin-Jumaat kecuali cuti umum, 8:00 pagi hingga 5:00 petang) atau ii) 013-6699 700.

Sehingga kini, punca jangkitan dan cara jangkitan bagi jangkitan MERS-CoV ini masih lagi belum dapat dikenalpasti. Pihak WHO juga menegaskan, buat masa ini tahap penularan jangkitan tersebut secara keseluruhannya tidak diketahui dan tiada vaksin untuk memberi perlindungan terhadap jangkitan MERS-CoV. Pihak WHO juga tidak mengeluarkan sebarang nasihat perjalanan (*travel advisory*) atau mengeluarkan sebarang larangan lawatan ke negara-negara yang terlibat.

KKM ingin menasihatkan orang awam yang ingin mengerjakan umrah di Tanah Suci atau mengadakan lawatan ke mana-mana negara di rantau Timur Tengah yang kini melaporkan kejadian jangkitan MERS-CoV, mengenai perkara-perkara berikut:

- i) Selalu mengamalkan tahap kebersihan diri yang tinggi seperti kerap mencuci tangan dengan menggunakan air dan sabun atau bahan pencuci tangan (*hand sanitizer*), terutamanya selepas batuk, bersin atau selepas bersalaman;
- ii) Semasa dalam tempoh lawatan, sentiasa membawa bersama penutup mulut dan hidung (*mask*) serta bahan pencuci tangan (*hand sanitizer*) untuk digunakan apabila perlu;
- iii) Semasa dalam tempoh lawatan, elakkan dari mendekati dan menyentuh orang yang sakit. Begitu juga, elakkan dari melawat ladang haiwan, khususnya ladang unta dan menyentuh sebarang jenis haiwan.
- iv) Semasa dalam tempoh lawatan, elakkan dari menjamah makanan mentah atau tidak dimasak, menjamah buah-buahan mahupun sayuran yang tidak dibasuh terlebih dahulu atau meminum minuman yang menggunakan bekalan air tidak terawat;
- v) Mereka yang pulang dari lawatan ke negara-negara yang terlibat, khususnya negara di rantau Timur Tengah dengan gejala jangkitan respiratori (seperti demam, batuk, selsema dan sakit tekak) adalah dinasihatkan untuk memakai penutup mulut dan hidung (*mask*), menjaga adab batuk serta mengamalkan kebersihan diri. Segera mendapatkan rawatan perubatan sekiranya tidak sihat serta maklumkan sejarah perjalanan mereka kepada doktor yang merawat.

Kerjasama pihak agensi pelancongan khususnya yang menguruskan jemaah umrah/haji dipohon agar dapat memperkukuhkan kesedaran mengenai kejadian jangkitan MERS-CoV melalui hebahan maklumat secara berterusan kepada para jemaah umrah/haji yang diuruskan. Bagi tujuan ini, agensi terbabit dipohon untuk merujuk kepada nasihat kesihatan sebagaimana yang disarankan di atas.

Kementerian Kesihatan Malaysia akan terus memantau situasi kejadian penyakit ini dan sebarang perkembangan akan dimaklumkan dari semasa ke semasa. Maklumat terkini berkaitan jangkitan MERS-CoV boleh diperolehi dari laman sesawang <http://www.moh.gov.my>.

Sekian dan terima kasih.

**DATUK SERI DR. S. SUBRAMANIAM**  
**MENTERI KESIHATAN MALAYSIA**

16 April 2014